

Rosas ed anc ina giada rosas

Son Valentin: Buns affars per ils flurists

DA GION NUTEGN STGIER / ANR

■ **Oz, il di da son Valentin vegnan vendidas en Svizra daplis flurs che per exempel il di da la mamma. Las butias da flurs fan da son Valentin 5% da la svieuta annuala. 35% da las flurs che vegnan cumpradas èn rosas cotschnas.** Il di da son Valentin, ils 14 da favrer vegn er numnà il di da l'amur e festivà vegn quel sin l'entir mund. L'usit da regalar da son Valentin a ses pli chars flurs ubain dultschims ha ina tradiziun da passa 600 onns. Anc pli popular è quel di lura vegnì a partir da quel mument ch'ìls flurists han cumenzà a far dapli reclama per il di da son Valentin sco di da l'amur e sco di da far in plaschair a las personas che stattan ad ins fitg a cor. Oz enconuscha vegl e giuven il di da son Valentin e quai er tar nus. Bunamain mintga terza persuna en Svizra regala il di da son Valentin flurs e savens er dultscharias. Da quellas regala mintga segunda persuna flurs, 27% regalan tschigulattas e pralinas e 20% fan in plaschair cun envidar ses char ubain sia chara a tschaina.

Tranter 600 e 650 rosas cotschnas

Discurrì avain nus cun *Urs Meier*, da preschent mainagestiu da l'Associaziun svizra dals flurists. El conferma che da



Rosas cotschnas, quellas tutgan tar il regal preferì dals Svizzers il di da son Valentin.

FOTO G. N. STGIER

son Valentin fetschian las butias da flurs megliers affars che per exempel il di da la mamma. Quai cunzunt cun esser il di da son Valentin fitg popular tar personas da 15 fin 30 onns. Il di da la mamma vegnan bain er vendidas bleras flurs, dentant prefereschian blers quel di dad ir a mangiar ordaifer empè da regalar flurs a la mamma. Tenor ina retschertga tar ils 1800 flurists ch'appartegnan a l'associaziun venda mintgin da son Valentin en media tranter 600 e 650 rosas cotschnas. Vendidas vegnan tranter 30% e 35% rosas cotschnas, tranter 25% e 30% vegnan cumpradas rosas cun ina outra color e 35% sajan outras flurs, sco cunzunt tulipanas, ha ditg *Urs Meier*. El ha er testifigà che las butias da flurs fetschian il di da son Valentin 5% da la svieuta annuala. *Urs Meier* fa dentant er attent ch'ìls furniturs da rosas ed outras flurs augmentian er ils pretschs per ils flurists intgigns dis avant son Valentin. Ina gronda concorrenza per las butias da flurs sajan natiralmain ils affars sco Coop, Migros e Landi. Quels vendan il di da son Valentin considerablmain anc daplis flurs che las outras 1800 butias da flurs pli pitschnas e pi grondas ch'i dat en Svizra. La gronda part da las rosas che vegnan vendidas il di da son Valentin derivan da l'Italia e da l'America dal sid e lura er da l'Ollanda.